

28 DEC 2000

Mahathir-Persaraan

DR MAHATHIR AKAN TERUS BERJASA KEPADA UMNO WALAUPUN SELEPAS BERSARA

Oleh: E.Sivabalan

KUALA LUMPUR, 28 Dis (Bernama) -- Datuk Seri Dr Mahathir Mohamad berjanji untuk terus berjasa kepada Umno walaupun setelah melepaskan jawatan Perdana Menteri.

Menurut beliau, sumbangan itu mungkin dalam bentuk idea-idea dan pengetahuan yang beliau perolehi dalam tempoh jawatannya.

"Walaupun saya bukan lagi Perdana Menteri, apa sahaja pengetahuan yang ada pada saya, yang boleh disumbangkan kepada parti, saya akan menyampaikannya," kata Presiden Umno itu lagi.

Dr Mahathir berkata demikian semasa ditanya sama ada beliau bersedia untuk menyerahkan jawatan Perdana Menteri kepada penggantinya menjelang pilihan raya akan datang.

Dr Mahathir selepas pilihan raya umum 1999 dipetik sebagai berkata penggal ini merupakan yang terakhir bagi beliau. Dr Mahathir menjadi Perdana Menteri pada 1981, menggantikan alahyarham Tun Hussein Onn.

Semasa bercakap dalam temubual eksklusif hujung tahun dengan BERNAMA di Pejabat Perdana Menteri di Putrajaya, pada Selasa, Dr Mahathir berkata beliau "tidak boleh meninggalkan parti sesuka hati dan meninggalkannya begitu sahaja."

Dr Mahathir berkata, beliau menjadi Perdana Menteri dan presiden Umno kerana sokongan parti dan apabila tiba masa, beliau perlu terus menyokong parti walaupun setelah melepaskan jawatan pemimpin negara.

Ditanya dalam kapasiti mana beliau mahu terus menyumbangkan jasa kepada parti, Dr Mahathir berkata ia boleh dibuat dalam pelbagai bentuk.

"Mungkin jika mereka mahu bertanyakan sesuatu kepada saya, saya sedia menjawabnya. Jika mereka mahu saya membuat sedikit kerja, saya boleh melakukannya sejauh mana yang mampu," katanya.

Bagaimanapun, Dr Mahathir tidak menyatakan bila beliau akan menyerahkan tugas memimpin negara kepada penggantinya dan memberikan alasan beliau untuk berbuat demikian.

"Sebab saya biarkan orang meneka bila saya akan menyerahkan tugas kepada pengganti saya ialah kerana apa sahaja ura-ura yang saya buat mengenainya akan memberi kesan kepada ekonomi. Dan saya tidak mahu pilihan peribadi saya membawa kesan buruk kepada pasaran.

Mengenai cadangan yang pemergian beliau akan menyebabkan negara kehilangan besar seorang dengan keupayaan dan kaliber seperti beliau, Dr Mahathir berkata bukan bermakna yang jika beliau tidak lagi menjadi Perdana Menteri semuanya akan terjejas.

"Semuanya akan berjalan tetapi dengan cara yang berlainan," katanya.

Beliau berkata, yang hanya menjadi ciri lazim ialah Barisan Nasional (BN) dan Umno akan teruskan dengan dasar-dasar sama," mungkin dengan sedikit perubahan di sana sini tetapi secara asasnya ia tetap dasar yang sama."

Dr Mahathir berkata beliau mendapati agak ganjil sementara ada pihak yang mengecam dan menuduh beliau sebagai memerintah dengan kuku besi, ada pula pihak berkata jika beliau bersara, tiada yang lain untuk menggantikannya. "Jadi terdapat pandangan yang bercanggah dalam hal ini," katanya.

Perdana Menteri berkata, suka atau tidak, satu hari nanti beliau tetap akan pergi. "Jika saya meninggal dunia, sudah pasti yang lain perlu mengambil alih tugas saya," katanya.

Dr Mahathir berkata, kepimpinan sekarang telahpun meletakkan Umno dalam

keadaan bersiap sedia bagi menghadapi hakikat itu.

"Jika saya pergi, orang lain akan ambil alih peranan saya. Proses penggantian sudahpun ditentukan," katanya.

Mengenai tuduhan yang beliau membuat keputusan tanpa berunding dengan Kabinet terlebih dahulu, Dr Mahathir berkata itu adalah tidak benar.

"Ia bukan kes satu orang membuat semua keputusan," katanya.

Dr Mahathir berkata beliau mengakui yang sepanjang kerjaya sebagai Perdana Menteri, beliau mengutarakan banyak idea tetapi terpulang kepada Kabinet sama ada untuk menerimanya atau tidak.

"Jika Kabinet tidak menerimanya, perkara itu orang ramai tidak akan tahu. Mereka hanya dapat lihat keputusan yang dipersetujui oleh Kabinet."

Beliau berkata di semua mesyuarat Kabinet, Menteri-menteri akan memberi pandangan dan akan membuat cadangan yang akan dibahaskan untuk menguji sama ada cadangan itu praktikal atau tidak.

"Inilah proses dalam bilik Kabinet dan anda tahu yang mesyuarat Kabinet adalah rahsia. Kita tidak rakamkan sesi Kabinet dalam filem. Tetapi saya boleh menjamin anda dan jika anda tanya setiap Menteri Kabinet, semua orang bersuara dalam mesyuarat itu dan ada kalanya saya berkata kita tidak mempunyai masa yang cukup.

"Jadi, untuk menganggap yang saya sahaja yang membuat undang-undang adalah tidak benar dan komen-komen seperti itu adalah berdasarkan tanggapan salah," kata Dr Mahathir lagi.

-- BERNAMA

ES ES PR